

տուիրելով եղբայրական և քրիստոնէական սիրով վարիւ
 ընդ օտարազգի քրիստոնեայս, որում արժանավայել յար-
 քանօք գրեալ էին պատասխան: Այս լուր կործանման
 չեւ էր հասեալ 'ի Կոստանդինուպօլիս, և գլխաւորք ազ-
 գին ջանային, այլ ոչ կարէին մերձեալ առ Նախարարս
 Տէրութեան. զի ժամանակ խռովութեան և պատերազմաց
 էր, եւ մանաւանդ հասեալ վախճան կենաց Մահմուտայ
 Արքայի՝ մարմին նորա կայր անթաղ 'ի տան, որոյ վասն
 գրէ Փոխանորդն համբերել սակաւ ինչ, զի չէր հնար 'ի
 վերայ սգոյ առարկայ խնճոյից բանալ: Եւ սպա 'ի 28
 Հոկտեմբերի արարին մասնաւոր ժողով, թէ վասն Համ-
 բարձման եւ թէ վասն խնդրոյ Ասորոց, եւ որոշեցին
 Միքայէլ, Ճէզայիրցի Մկրտիչ՝ եւ Կելկելեան Յարութիւն
 Ամիրայք խորհիլ 'ի միասին և խնդրել յարքունի Դիւանէ
 զպատճէն հրովարտակին՝ զոր ընկալեալ էին Լատինք, ե-
 թէ գտցեն 'ի նմա օգտաւէտ բանս ինչ, մատիցեն առ
 Նախարարս եւ առ ոմանս արքունեաց, որք կարողք են
 առնել որպէս և կամին. այլ 'ի հասանիլ նամակաց յերու-
 սաղէմէ լռեալ դադարեցին 'ի գործոյ:

Ինքնական Օսմանեան Պէտութեան Սուլթան Ապտիւլ
 Մէճիտ Խան արար մեծահանդէս ժողով 'ի պալատն Թօփ
 Գարու 'ի Կիւհնէ ասացեալ տեղին, ուր ինքն մեծազօր
 Արքայն 'ի վերին դատիկոնի հանդէպ լուսամտի բազմեալ
 'ի գահոյս երեւեցաւ առաջի խումն բազմութեան, ուր
 էին Սատրազամն և բոլոր Նախարարք Տէրութեան և Փա-
 շայք հանդերձ զօրականօք, Շէյխ իւլ Իսլամն դասուք գիտ-
 նականաց, Գլխաւորք արհեստաւորաց, Դեսպանք Տէրու-
 թեանց, Պատրիարքունք քրիստոնեայ ազգաց, ընդ որս
 եւ Նախամագլուխն Հրէից, թող զայլ հասարակ ժողո-
 վուրդս. յաշխարհաժողով հանդիսի աստ արտաքին գործոց
 պաշտօնեայն ընթերցաւ 'ի լուր ամենեցուն զԿայսերական
 հրովարտակն (Սաթթի Հիւմայուն Հոկտեմբեր):

Ասացուք կարճ 'ի կարճոյ վասն Եգիպտոսի. զի 'ի ըս-
 կըզբանէ անտի հոգեւոր տեսչութիւն Հայ ժողովրդոց եր-
 կրին այնորիկ վիճակեալ էր Երուսաղէմի, որպէս յայտ
 առնէ զայս հրովարտակն Մարտիրոս Պատրիարքի՝ տուեալ
 'ի Սուլթանաց Եգիպտոսի և զայլ և այլ պարագայս գոր-